



## MUNYATUL MUSOLLI

(Cita-Cita Orang Yang Bersembahyang)

### 04 SYARAT SAH SEMBAHYANG

Ketahui oleh kamu, hai orang yang berkehendak kemenangan! Setengah daripada orang yang berkehendak kemenangan! Setengah daripada orang yang muhafiz (محافظ), yakni memelihara bagi sembahyang dan yang mendirikan dia, hendaklah ia memelihara segala syaratnya. Maka adalah syarat sembahyang itu 9 perkara:

**PERTAMA:** Mengetahui bagi masuk waktunya dengan yakin atau dengan **zon** (ظن - berat sangkaan). Maka tiada sah orang yang sembahyang yang tiada mengetahui akan masuk waktunya dan tiada zonnya, dan jika jatuh di dalam waktunya sekalipun.

**KEDUA:** Berhadap ia akan kiblat. Yakni, akan Ka'bah jikalau dengan ijtihadnya sekalipun.

**KETIGA:** Menutup (warna) aurat antara pusat dan lutut jika laki-laki dan sahaya perempuan. Dan sekalian tubuhnya jika perempuan dan **khuntsa** (خنثى) yang merdeka, yang lain daripada mukanya dan dua tapak tangannya dengan suatu yang menutup dan menegah daripada dilihat warna kulitnya pada pihak atas dan kelilingnya, tiada pihak bawahnya jikalau dengan lumur lumpur sekalipun.

**KEEMPAT:** Mengetahui ia akan kaifiat sembahyang. Seperti, bahawa diketahui akan fardhunya dan dibezakan dia daripada sunatnya. Bahkan, jika ia i'tiqadkan sekalian itu fardhu, atau setengahnya fardhu dan setengahnya sunat dan tiada dibezakan, padahal orang awam dan tiada diqasatkan sunat yang difardhunya, sahlah sembahyangnya.

**KELIMA:** Suci ia daripada hadats besar dan hadats kecil. Maka, jika kedatangan hadats di tengah sembahyangnya, batal sembahyangnya.

**KEENAM:** Suci ia daripada najis yang tiada dimaafkan dia pada tubuhnya, dan kainnya, dan tempatnya. Dan janganlah bersentuh suatu suku daripada badannya dengan najis pada geraknya dan diamnya. Maka tiada sah sembahyang serta sesuatu daripadanya (najis) atau ia menanggung sesuatu yang berhubung dengan najis, seperti ia menanggung akan tali yang terikat pada umpama anjing dan lainnya. Dan tiada mengapa jika berbetulan dengan dia pada ketika banggunya dan duduknya dengan ketiadaan bersentuh. Dan dimaafkan tempat **istinja'** (استنجاء) dengan umpama batu, dan sedikit darah, dan tahi lalat, dan tanah jalan raya yang najis, dan darah tuma, dan kutu anjing, dan darah bisul, dan nanah, dan **danur** (دانور), dan air kuman yang ada bagiya baunya. Dan jikalau sembahyang ia dengan najis yang tiada dimaafkan daripadanya dengan tiada mengetahui akan dia atau dengan lupa, kemudian teringat, nescaya wajib mengulangi akan dia.

**KETUJUH:** Meninggalkan berkata-kata dengan sengaja yang bukan Qur'an (قرآن), atau zikir, atau doa. Maka batal sembahyangnya dengan berkata-kata dua huruf sama ada memberi faham perkataannya atau tiada. Atau dengan satu huruf memberi faham seperti [ق] atau [ع] kerana makna ق daripada **wiqoyah** (وقاية - jaga) dan ع itu daripada **wi'ayah** (وعاية - ingat). Atau satu huruf yang bermad kerana mad itu ada kalanya alif (الف) atau wau (واو) atau ya (ياء), maka jadi dua huruf. Maka batal sembahyangnya dengan yang demikian itu.

**KEDELAPAN:** Meninggalkan (atau) melebihi rukun fi'li (فعلى - perbuatan) dengan sengajanya. Maka jika ia sujud 3 kali atau ruku' 2 kali, seperti ia sujud di atas umpama suatu yang tajam, maka diangkatkan dahinya, maka sujud pula, nescaya menambahi sujud. Jikalau sedikit diangkatkan kepalanya sekalipun, maka dinamakan menambahi rukun fi'li, maka batal sembahyangnya dengan dia. Dan demikian lagi, wajib meninggalkan perbuatan yang bukan daripada jenis sembahyang seperti memukul 3 kali pukul, atau melangkah 3 langkah yang berturut-turut, atau lain daripadanya, atau satu langkah yang keji seperti melompat ia. Maka batal sembahyang dengan dia. Tetapi, dimaafkan perbuatan yang sedikit jikalau banyak sekalipun, seperti menggerakkan anak jarinya membilang tasbih atau mengaru-garu anak jarinya dengan tiada bergerak tapak tangannya, tiada batal sembahyangnya dengan dia.

**KESEMBILAN:** Jangan mengerjakan sesuatu yang membatalkan puasanya di dalam sembahyang, seperti makan dan minum (sengaja atau terlupa), dan memasukkan sesuatu di dalam rongga yang terbuka, seperti memasukkan sesuatu ke dalam hidungnya dan telinganya sampai kepada batin keduanya. Dan jikalau dengan digagahi (dipaksa) dia atas perbuatan yang demikian itu sekalipun (batal sembahyang), kerana **nadir** (نادر – jarang/ganjil) yang demikian itu. Dan dua gerak atau dua langkah, sedikit namanya pada 'uruf (عرف - pandangan orang ramai), tiada batal sembahyang dengan dia.

Ini lah 9 syarat (barang yang terhenti atasnya oleh sah sembahyang). Maka wajib kita peliharakan dia supaya sah sembahyangnya. Dan jikalau ditinggal satu syarat daripadanya, tiada sah sembahyangnya.